



**CONVENIO DE COLABORACIÓN ENTRE O CONCELLO DE VIGO E A MANCOMUNIDADE DE  
MONTES DE VIGO EN MATERIA MEDIOAMBIENTAL**

En Vigo, vinte e sete de outubro de dous mil dezaseis.

**REUNIDOS:**

**DUNHA PARTE**, D. Abel Caballero Álvarez, na súa calidade de Alcalde do Concello de Vigo (CIF : P-3605700-H), con enderezo en Praza do Rei s/n de Vigo.

**DOUTRA**, D. Uxío González Pérez, presidente da Mancomunidade de Montes de Vigo (en adiante, MMV), CIF V-36840726, inscrita co número 2987 no Rexistro Xeral de Comunidades de Montes da Consellería de Medio Rural da Xunta de Galicia, na súa representación segundo resulta do acordo da asemblea xeral realizada o día 11 de abril de 2016 e o artigo 31 dos seus estatutos,

Ámbalas dúas partes recoñécense con capacidade legal suficiente para establecer o presente convenio e, para os efectos,

**MANIFESTAN:**

1.- Que o Concello de Vigo, ao abeiro do establecido no artigo 25.2., apartados a), b), l) da vixente Lei 7/1985, de 2 de abril, reguladora das bases de réxime local e de conformidade coa lexislación do estado e da comunidade autónoma de Galicia, ten atribuído competencias na protección do medio ambiente urbano, protección do solo, salubridade, ocupación do tempo de lecer.

2.- A área municipal de Medio Ambiente, en virtude da resolución da alcaldía do 19 de xuño de 2015 (BOP do 14/07/2015), exerce competencias en materia medioambiental, entre as que destacan:

- Desenvolver programas e campañas de información, sensibilización e concienciación social en relación coa protección do medio ambiente.
- Velar pola limpeza e mantemento dos carreiros ou roteiros que transcorren polo termo municipal e valorar a conveniencia e oportunidade de crear novos carreiros.
- Velar polo mantemento e conservación dos recursos naturais existentes en todo o termo municipal.
- Protección de animais no termo municipal.
- Limpeza e salubridade de fincas, co obxecto de evitar incendios e cuestións de insalubridade pública en relación co vertidos, residuos, pragas...



3.- A MMV, é unha entidade sen ánimo de lucro que agrupa a tódalas Comunidades de Montes da cidade de Vigo, ás que representa na defensa dos intereses que lles son comúns, cuxo obxectivo fundacional é a defensa e mellora dos montes das entidades de Vigo, nos seus aspectos económicos, sociais, ecolóxicos, culturais e de relación.

O entorno urbano e periurbano do Concello de Vigo está rodeado de montes de singular importancia tanto para súa flora, fauna silvestre, como polas súa paisaxe, de titularidade, na súa meirande parte, de Comunidades de Montes Veciñais en Man Común.

Estes espazos considéranse de interese para a levar a cabo programas e actividades de sensibilización ambiental, de educación ambiental, de ocupación do tempo de lecer en actividades vinculadas ao medio ambiente, na promoción de boas prácticas cidadás relativas á xestión sustentable dos solos, dos recursos existentes no medio, tanto urbano como rústico ou natural, dos residuos, da reciclaxe e outros que contribúen á utilización responsable dos recursos dispoñibles.

A protección do medio ambiente exerceuse non so a través dos procedementos de disciplina medioambiental, senón tamén a través de políticas de sensibilización, educación e concienciación da cidadanía en materia medioambiental.

As distintas leis sectoriais, tanto estatais como da C.A. de Galicia, recollen dentro dos seus principios inspiradores a educación ambiental, a sensibilidade e concienciación da cidadanía polo respectoo e protección do medio ambiente.

Neste sentido, a Lei 1/1995, de 2 de xaneiro, de protección ambiental de Galicia establece no seu artigo 2.e, como un dos principios inspiradores da Lei, o da promoción da educación ambiental e da concienciación cidadá, en tódolos sectores sociais, para una eficaz defensa dos valores ambientais, a fin de que, de acordo coa información obxectiva, completa e actual, poida participar a totalidade da poboación na defensa do seu medio ambiente.

4.- Que de conformidade co anterior, ambas as dúas partes acordan subscribir o presente convenio marco de colaboración en materia medioambiental, de acordo coas seguintes.

#### CLÁUSULAS:

**PRIMEIRA.-** O presente convenio servirá de guía para a colaboración entre ambas as dúas institucións en todo tipo de asuntos relativos a materias medioambientais que resulten de interese mutuo, entre os cales se citan de forma non exhaustiva os seguintes:

- Organización e realización de actividades de información, sensibilización, educación e concienciación social en relación coa protección do medio ambiente, que discorran por zonas de Montes Veciñais en Man Común.
- Organización de andainas por rutas medioambientais que discorran, total ou parcialmente, por zonas de Montes Veciñais en Man Común.
- Colaboración mutua na reparación da sinalética, limpeza de sen das existentes, dentro do termo municipal de Vigo, en especial, nos tramos que discorran polas comunicades de montes: GR 53, GR 58, PR-G 1, PR-G 5, PR-G 9.



- Colaboración mutua en proxectos de creación e divulgación de roteiros ou sendas que discorran total ou parcialmente en zonas de Montes Veciñas en Man Comun.
- Colaboración mutua en materia de limpeza, salubridade de fincas, co obxecto de evitar incendios e cuestións de insalubridade pública en relación co vertidos, residuos, pragas, maleza en cumprimento da normativa vixente.
- Colaboración mutua no intercambio de información, datos, co obxecto de realizar publicacións, traballos e calquera documento que sexa relevante para a realización de proxectos conxuntos, sempre dentro do respecto ás demais cláusulas.
- Informar e facilitar a participación conxunta no ámbito da comunicación social sobre asuntos de mutuo interese.
- Calquera outra actuación que ámbalas dúas partes consideren de interese e acorden en referencia ao medio ambiente e desenvolvemento sustentable.

**SEGUNDA.-** O presente convenio pretende establecer un marco de referencia para a colaboración mutua en materia de medio ambiente, quedando as concretas accións ou actividades que se desenvolvan subxeitas á aprobación dos programas ou actividades na forma legalmente previstas e de conformidade coas dispoñibilidades orzamentarias existentes.

**TERCEIRA.-** A vixencia e duración do presente convenio será de dous anos a partir da súa sinatura e poderá prorrogarse ano a ano por dous anos máis, por mutuo acordo expreso das partes que deberá adoptarse cada ano e antes da finalización do convenio.

**CUARTA.-** Para o seguimento do establecido no presente convenio, así como para aclarar as dúbidas que suscite a súa interpretación, constituirase unha Comisión de Coordinación da que formen un máximo de catro representantes da MMV, a concelleira da Área Medio Ambiente que actuará como presidenta e os técnicos municipais do servizo de Medio Ambiente.

Esta comisión reunirse no prazo de quince días a contar da petición expresa realizada por calquera das partes, no Concello de Vigo.

**QUINTA.-** As actividades que se desenvolva no marco deste convenio de colaboración incluirán o logotipo do Concello de Vigo e o da Mancomunidade de Montes de Vigo.

**SEXTA.-** A MMV está informada de que os seus datos e os do seus representantes serán incorporados aos ficheiros municipais. Os ditos datos serán tratados e protexidos de acordo co previsto na Lei 30/1992, do 26 de novembro de Réxime Xurídico das Administracións Públicas e do Procedemento administrativo Común e na Lei 15/1999, do 13 de decembro, de Protección de Datos de Carácter Persoal, sendo responsable do seu tratamento o Concello de Vigo: Concellería de Medio Ambiente.

A referida entidade poderá exercer os dereitos de acceso, rectificación, cancelación e oposición ante o Concello de Vigo: Concellería de Medio Ambiente.



O Concello de Vigo recoñece expresamente que a mesma información lle foi facilitada pola MMV en relación ós datos de carácter persoal contidos no presente documento, que serán así mesmo incorporados ós ficheiros correspondentes daquela e tratados ós fins derivados do Convenio, podendo exercitar o Concello de Vigo os dereitos de acceso, rectificación oposición e cancelación ante a entidade no seu domicilio social.

No tratamento da documentación ou información xerada no ámbito do presente Convenio deberá cumprirse co disposto na lexislación vixente en materia de protección de datos de carácter persoal.

**SÉTIMA.-** Cada unha das partes comprométese a non difundir, salvo autorización expresa, ningunha documentación ou información xerada no ámbito do presente Convenio.

**OITAVA.-** O presente convenio ten natureza administrativa, non se considera un contrato administrativo ó abeiro do establecido no artigo 4.1.d) do Real decreto lexislativo 3/2011, de 14 de novembro, polo que se aproba o texto refundido da lei de contratos do sector público, rexerase pola súa normativa específica, aplicándose os principios da lei de contratos para resolver as dúbidas e lagoas que puideran presentarse, polos pactos que se conteñen neste convenio e as restantes normas de dereito administrativo e, no seu defecto, as normas de dereito privado. No suposto de diverxencias na interpretación e execución deste, será a orde xurisdiccional contencioso-administrativa a competente para a súa resolución.

E en proba de canto antecede, as partes que interveñen asinan este convenio por triplicado exemplar e a un só efecto no lugar e data indicada no seu encabezamento.

Polo Concello de Vigo,  
O Alcalde

Abel Caballero Álvarez



Pola Mancomunidade de Montes de Vigo,  
O Presidente

Uxío González Pérez

Dou fe,

A titular do órgano de apoio á Xunta de Goberno Local,

Concepción Campos Acuña